

摘藻堂四庫全書薈要

史部

欽定四庫全書叢要

史部

文獻通考卷三百三十二



欽定四庫全書薈要卷九千六百五十四

史部

文獻通考卷三百三十二

鄱陽馬端臨貴與著

四裔考九

真臘

真臘國在林邑西南本扶南之屬國也去日南郡舟行六十日而至南接車渠國西有朱江國其王姓刹氏名質多斯那自其祖漸已強盛至質多斯那遂兼扶南而

有之死子伊奢那先代立居伊奢那城郭下二萬餘家  
城中有一大堂是其王聽政所總三十所城有數千家  
各有部帥官名與林邑同其王三日一聽朝坐五香七  
寶床上施寶帳以文木為竿象牙金鈿為壁狀如小屋  
懸金光焰有同於赤土前有金香鼎命二人侍側王著  
朝霞古貝瞞絡腰腹下垂至脰頭戴金寶花冠被真珠  
纓絡足履革屐耳懸金璫常服白疊以象牙為幬若露  
髮則不加纓絡臣下服制大抵相類有五大臣一曰孤

落支二曰相高憑三曰婆何多陵四曰舍摩陵五曰髯  
羅婁及諸小臣朝於王者輒於階下三稽首王呼上階  
則跪以兩手抱膊遶王環坐議政事訖跪伏而去階庭  
門閤侍衛有千餘人被甲持仗其國與參半朱江二國  
和親數與林邑陀桓二國戰爭其人行止皆持甲仗若  
有征伐因而用之其俗非王正妻子不得為嗣王初立  
日所有兄弟並刑殘之或去一指或剗其鼻別處供給  
不得仕進人形小而色黑婦人亦有白者悉拳髮垂耳

性氣捷勁居處器物頗類赤土以右手為淨左手為穢  
每旦澡洗以楊枝淨齒讀經呪飲食多酥酪沙糖粳粟米餅欲  
用楊枝淨齒又讀經呪飲食多酥酪沙糖粳粟米餅欲  
食之時先取雜肉羹與餅相和手濡而食娶妻者唯送  
女人女擇日遣媒人送婦男女二家各八日不出晝夜  
燃燈不息男婚禮畢即與其父母分財別居父母死小  
兒未婚者以餘財與之若婚畢財物入官喪葬兒女皆  
七日不食剔髮而喪僧尼道士親故皆來聚會音樂送

之以五香木燒屍收灰以金銀瓶盛送大水之內貧者  
或用瓦而以五綵色畫之亦有不焚送屍山中任野獸  
食者其國北多山阜南有水澤地氣尤熱無霜雪饒瘴  
癘毒蠱宜梁稻少黍粟果菜與日南九真相類異者有  
婆羅那娑樹無花葉似柿實似冬瓜菴羅花葉似棗實  
似李毗野樹花似木瓜葉似杏實似楮婆田羅樹花葉  
實並似棗而小異歌畢佗樹花似林檎葉似榆而厚大  
實似李其大如升自餘多同九真海有魚名建同四足

無鱗鼻如象吸水噴高五六十尺有浮胡魚形似鮓  
背如鸚鵡有八足多大魚半身出望之如山每五六月  
中毒氣流行即以白猪白羊於城西門外祠之不然五  
穀不登畜多死人疾病近都有陵伽鉢婆山上有神祠  
每以兵二千人守衛之城東神名婆多利祭用人肉其  
王年別殺人以夜祠禱亦有守衛者千人其敬鬼神如  
此多奉佛法尤信道士佛及道士並立像於其館隋大  
業十二年遣使貢獻帝禮之甚厚於後亦絕唐武德至

聖歷凡四來朝神龍後分為二半北多山阜號陸真臘  
半南際海饒陂澤號水真臘半水真臘地八百里王居  
婆羅提拔城陸真臘或曰文單曰婆婁地七百里王號  
苴屈開元天寶時王子率其屬二十六來朝拜果毅都  
尉太歷中副王婆彌及妻來朝獻馴象十一擢婆彌試  
殿中監賜名賓漢是時德宗初即位珍禽奇獸悉縱之  
蠻夷所獻馴象畜苑中元會充廷者凡三十二悉放荆  
山之陽及元和中水真臘亦遣使入貢文單西北屬國

曰參半武德八年使者來道明者亦屬國無衣服見衣服者共笑之無鹽鐵以竹弩射鳥獸自給宗政和六年十二月遣進奉使奉化郎將鳩摩僧哥副使安化郎將摩君明擒思等十四人來賜以朝服僧哥言萬里遠蕃仰投聖化尚拘卉服未稱嚮慕之誠願許服所賜詔聽之仍以其事付史館書於策明年三月辭去宣和二年又遣使來朝廷封其王與占城等

其年授占城王檢校司空兼御史大夫懷

遠軍節度使琳州管内觀察處置等使封占城國王其後又加封邑其地接占城之南東

至海西至蒲甘南至加囉希其縣鎮風俗與占城無異  
地方七千餘里有銅臺上列銅塔二十有四鎮以八銅  
象各重四千斤戰象幾二十萬馬多而小建炎三年以  
郊恩制授其王金褒賓深檢校司徒加食邑後以為常  
紹興元年廣南市舶司言其國附到蕃信與知州提舉  
詔勿受如可備官用即估直償之仍以省物回賜十七  
年宰臣奏其國王降制加恩事上曰日後郊祀外國加  
惠可令先次檢舉庶知本朝懷遠之意其國舊與占城

鄰好歲貢金若干兩淳熙四年五月望日占城主以舟師襲其國都誓必報怨慶元己未大舉入占城更立真臘人為主占城今亦為真臘屬國矣真里富真臘屬國也其國在西南隅東南接波斯蘭西南與登流眉為鄰所管聚落六十餘處慶元六年慶元府言其國王立二十年遣使齎表貢瑞象二及方物詔優答之仍諭本國海道遠涉今後免行入貢

羅刹

羅刹國在婆利之東其人極陋朱髮黑身獸牙鷹爪時與林邑人作市輒以夜晝日則掩其面隋煬帝大業三年遣使常駿等使赤土至羅刹

### 投和

投和國隋時聞焉在南海大洲中真臘之南自廣州西南水行百日至其國王姓投和羅名脯邪乞遙理數城覆屋以瓦並為閣而居屋壁皆以彩畫之城內皆王宮室城外人居可萬餘家王宿衛之士百餘人每臨朝則

衣朝霞冠金冠耳挂金環頸挂金涎衣

連序反

足履寶裝

皮履官屬有朝請將軍總知國政又有參軍功曹主簿

城局金威將軍贊府等官分理文武又有州及郡縣州

有參軍郡有金威將軍縣有城局其為長官初至各選

官寮助理政事刑法盜賊多者死輕者穿耳及鼻并鑱

鬢私鑄銀錢者截腕國無賦稅俱隨意貢奉無多少之

限多以農商為業國人乘象及馬一國之中馬不過千

匹又無鞍轡唯以繩穿頰為節制音樂則吹蠡擊鼓死

喪則祠祀哭泣又焚屍以麗盛之沉於水中若父母之  
喪則截髮為孝其國市六所貿易皆用銀錢小如榆莢  
有佛道有學校文字與中夏不同訊其耆老云王無姓  
名齊杖摩其屋以草覆之王所坐塔圓似佛塔以金飾  
之門皆東開坐亦東向唐貞觀中遣使奉表以金函盛  
之又獻金榼

苦盍反

金鎮寶帶犀象海物等數十品

### 閩婆

閩婆國在南海中其國東至海一月汎海半月至崑崙

國西至海四十五日南至海三日汎海五日至大食國  
北至海四日西北汎海十五日至渤泥國又十日至三  
佛齊國又七日至古邏國又七日至柴厯亭抵交趾達  
廣州其地平坦宜種植產稻麻粟豆無麥民輸十一之  
租煮海為鹽多魚鼈雞鴨山羊魚椎牛以食果實有木  
瓜椰子蕉子甘蔗芋出金銀犀牙箋沉檀香茴香胡椒  
檳榔硫黃紅花蘇木亦務蠶織有薄絹絲絞吉貝布翦  
銀葉為錢博易官以粟一斛二斗博金錢室宇壯麗飾

以金碧中國賈人至者待以賓館食豐潔地不產茶其  
酒出於椰子及蝦蟇丹樹之中蝦蟇丹樹花人未嘗見  
或以桄榔檳榔釀成亦甚香美不設刑禁雜犯罪者隨  
輕重出黃金以贖惟寇盜者殺之其王椎髻戴金鈴衣  
錦袍躡革履坐方床官吏日謁三拜而退出入乘象或  
腰輿壯者五七百輩執兵以從國人見王皆坐俟其過  
乃起以王子三人為副王官有落佶連四人共治國事  
如中國宰相無月俸隨時量給土產諸物次有文吏三

百餘員目為秀才掌文簿總計財貨又有卑官殆千員分主城池帑廩及軍卒其領兵者每半歲給金十兩勝兵三萬每半歲亦給金有差土俗婚聘無媒妁但納黃金於女家以娶之五月游船十月游山有山馬可乘跨或乘軟兜樂有橫笛鼓板亦能舞土人被髮其衣裝纏胸以下至於膝疾病不服藥但禱神求佛其俗有名而無姓方言謂真珠為沒爹蝦囉謂牙為家囉謂香為崑燉盧麻諸犀為低密宗元嘉十二年國王師黎婆達阿

陀羅跋摩遣使奉表曰宗國大主人大吉天子足下教  
化一切種智安穩大人師降伏四魔成等正覺轉尊法  
輪度脫衆生我雖在遠亦霑靈潤其後遂絕宋太宗淳  
化三年十二月其王穆羅茶遣使陀湛副使蒲亞理判  
官李陀那假澄等來朝貢陀湛云中國有真主本國乃  
修朝貢之禮國王貢象牙真珠繡花銷金及繡絲絞雜  
色絲絞吉貝織雜色絞布檀香玳瑁檳榔盤犀裝劍藤  
織花簞白鸚鵡七寶飾檀香亭子其使別貢玳瑁龍腦

丁香藤織花簞先是朝貢使汎舶船六十日至明州定海縣掌市舶監察御史張肅先釋奏其使飾服之狀與嘗來入波斯相類譯者言云金主舶大商毛旭者建溪人數往來本國因假其鄉導來朝貢又言其國王一號曰夏至馬囉夜王妃曰落肩娑婆利本國亦署置僚屬又其方言目舶王為勃荷王妻曰勃荷比尼贖其船中婦人名眉珠椎髻無首飾以蠻布纏身顏色青黑言語不能曉拜亦如男子膜拜一子頂戴金連鎖子手有金

鈎以帛帶縈之名阿嚕其國與三佛齊有讐怨互相攻  
戰本國山多猴不畏人呼以霄霄之聲即出或投以果  
實則有大猴二先至土人謂之猴王猴夫人食畢羣猴  
食其餘使既至上令有司優待之久使還賜金幣甚厚  
仍賜良馬戎具以從其請其使云鄰國名婆羅門有法  
善察人情人欲相危害者皆先知之又有摩逸國太平  
興國七年載寶貨至廣州海岸大觀三年閣婆復遣  
使入貢詔禮之如交趾建炎三年制授懷遠軍節度琳

州管內觀察處置等使金紫光祿大夫檢校司空使持  
節琳州諸軍事琳州刺史兼御史大夫上柱國闍婆國  
王食邑二千四百戶食實封一千戶悉里地茶蘭固野  
可特授檢校司空加食邑實封以南郊加恩也自後每  
遇大禮必加食邑

訶羅陀

西南夷訶羅陀國宋元嘉七年遣使奉表曰伏承聖主  
信重三寶興立塔寺周滿世界今故遣使二人表此微

心

呵羅單

呵羅單國都闍婆洲宋元嘉七年遣使獻金剛指環及  
鸚鵡鳥天竺國白疊吉貝葉波國吉貝等物十年呵羅  
單國王毘沙跋摩奉表曰常勝天子陛下諸佛世尊常  
樂安隱三達六通為世間導是名如來是故至誠五體  
敬禮其後為子篡奪十三年又上表二十六年文帝詔  
曰呵羅單婆皇婆達三國頻越遐海款化納貢遠誠

宜甄可並加除授乃遣使策命之二十九年又遣長史婆和沙彌獻方物

婆皇

婆皇國宋元嘉二十六年國王舍利婆羅跋摩遣使獻方物四十一種文帝策命之為婆皇國二十八年孝武孝建三年俱遣使入貢方物以其使為振威將軍大明三年獻赤白鸚鵡大明八年明帝泰始二年俱入貢官其使

婆達

婆達國宋元嘉二十六年國王舍利不陵伽跋摩遣使貢方物文帝策命之為婆達國王二十八年復遣使獻方物

丹丹

丹丹在多羅磨羅國西北振州東南

振州唐延德郡朱厓同在島山王

姓刹利名尸陵伽治所可二萬餘家亦置州縣以相統領王每晨夕二時臨朝其大臣八人號曰八坐並以婆

羅門為之王每以香粉塗面身冠通天冠挂雜寶瓔珞  
身衣朝霞足履皮屨近則乘輿遠則馭象其攻伐則吹  
蠡擊鼓魚有幡旗其刑治盜賊無多少皆殺之土出金  
銀白檀蘇方木檳榔其穀唯稻畜有沙牛殺羊豬雞鵝  
鴨黿鳥有越鳥孔雀果蓏有蒲桃石榴瓜瓠美蓮菜有  
葱蘇蔓菁梁中大通二年其王遣使奉表送象牙及畫  
塔二軀并獻火齊珠吉貝雜香藥大同元年復遣使獻  
金銀琉璃雜寶香藥等物唐總章時又獻方物

邊斗

邊斗國

一云班斗

都昆國

一云都軍

拘利國

一云九離

比嵩國

並隨時聞焉扶南度金隣大灣南行三千里有此四國  
其農作與金隣同其人多白色都昆出好棧香藿香及  
流黃其藿香樹生千歲根本甚大伐之四五年木皆朽  
敗唯中節堅固芬香獨存取以為香

杜薄

杜薄國隋時聞焉在扶南東漲海中直渡海數十日而

至其國人貌白皙皆有衣服國有稻田女子作白疊華  
布出金銀鐵以金為錢出雞舌香可以含以香不入衣  
服雞舌其為木也氣辛而性厲禽獸不能至故未有識  
其樹者華熟自零隨水而出方得之杜薄洲有十餘國  
城皆稱王

薄利

薄利國隋時聞焉在拘利南海灣中其人色黑而齒白  
眼正赤男女並無衣服

# 敎焚

敎焚洲抱朴子云敎焚洲在南海中薰綠水膠所出膠

如楓脂所以不可多得者止患狃狃

上音詒  
下音屈

獸啖人此

獸大者重十斤狀如水獺其頭身及佗處了無毛唯從  
鼻上以竟脊至尾上有毛廣一寸許青毛長三四分許  
其無毛處則如帛囊人張捕得之斬刺不傷積薪烈火  
縛以投火中薪盡而此獸不焦須以大杖打之皮不傷  
而骨碎都盡乃死耳

# 火山

火山國隋時聞焉去諸薄東五千里國中山皆有火  
雖雨不息火中有白鼠扶南土俗傳云火洲在馬五洲  
之東可千餘里春月霖雨雨止則火然洲上林木得雨  
則皮黑得火則皮白諸左右洲人以春月取其木皮績  
以為布或作燈炷布若小穢投之火中使潔又有加營  
國北諸薄國西山周三百里從四月火生正月火滅火  
然則草木葉落如中國寒時人以三月至此山取木皮

績為火浣布

無論

無論國隋時聞焉在扶南西二千餘里其國大道左右  
夾種枇杷樹及諸華果行其下常有重陰十里一亭亭  
皆有井食麥飯飲蒲桃酒如膠若飲即以水和之味甚  
甘美

婆登

婆登國在林邑南海行二月東與訶陵西與迷黎車接

北隣大海風俗與訶陵同種稻每月一熟有文字書於  
貝多葉其死者口實以金又以金釧貫於四支然後加  
以婆律膏及檀沉龍腦等香積薪以燔之唐貞觀二十  
一年遣使朝貢

烏篤

烏篤國在中天竺南一名烏伏邦地方五千餘里百姓  
殷實人姓懦弱頗詭詐尤工禁術篤信佛法文字禮儀  
略同天竺自古不通中國唐貞觀中其王達摩因陀訶斯

遣使獻龍腦香

訶陵

訶陵亦曰杜婆曰闍婆在南海中東距婆利西墮婆登  
南瀕海北真臘木為城雖大屋亦覆楸閭象牙為牀若  
席出玳瑁黃白金犀象國最富有穴自湧鹽以柳花椰  
子為酒飲之輒醉宿昔壞有文字知星歷食無七飭有  
毒女與接輒苦瘡人死尸不腐王居闍婆城其祖吉延  
東遷於婆露伽斯城旁小國二十八莫不臣服其官有

三十三大夫而大坐敢兄為最貴山上有郎卑野州王  
常登以望海夏至立八尺表景在表南二尺四寸唐貞  
觀中與墮和羅墮婆登皆遣使者入貢太宗以璽詔優  
答墮和羅丐良馬帝與之至上元間國人推女子為王  
號悉莫威令整肅道不舉遺大食君聞之齎金一囊置  
其郊行者輒避如是三年太子過以足躡金悉莫怒將  
斬之羣臣固請悉莫曰而罪實本於足可斷趾羣臣復  
為請乃斬指以徇大食聞而畏之不敢加兵大歷中訶

陵使者三至元和八年獻僧祇奴四五色鸚鵡頻伽鳥  
等憲宗拜內四門府佐果毅使者讓其弟帝嘉義並官  
之訖大和再朝貢咸通中遣使獻女樂墮和羅

亦曰獨和羅南

距盤  
盤北

迦邏舍弗西屬海東真臘自廣州行五月乃至國

多義犀世謂墮和羅西有二屬國曰曇陵陀洹曇陵在  
海洲中陀洹一曰耨陀洹在環王西南海中與墮和羅  
接自交州行九十日乃至王姓察失利名婆那字婆未  
無蠶桑有稻麥麻豆畜有白象牛羊猪俗喜樓居謂為

干欄以白氎朝霞布為衣親喪在室不食燔尸已則剔  
髮浴於池然後食貞觀時並遣使者再入朝又獻婆律  
膏白鸚鵡首有十紅毛齊於翅因丐馬銅鐘帝與之墮  
婆登在環王南行二月乃至東訶陵西迷黎車北屬海  
俗與訶陵同種稻月一熟有文字以貝多葉寫之死者  
實金於口以釧貫其體加婆律膏龍腦衆香積薪燔之  
多蔑

多蔑國其人短小兄弟共娶一妻婦總髮為角辨夫之

多少唐貞觀中通馬在南海邊國界周廻可一月行  
南阻大海西俱遊國北波刺國東真沱洹國戶口極  
多置三十州不役屬他國有州郭宮殿樓櫓並用瓦木  
以十二月為歲其物產有金銀銅鐵象牙犀角朝  
霞朝雲其俗交易用金銀朝霞等衣服百姓二十而  
稅一五穀菜蔬與中國不殊

多摩長

多摩長國居於海島東與婆鳳西與多隆南與半支

跋華言五山也北與訶陵等國接其國界東西可一月行南北可二十五日行其王之先龍子也名骨利骨利得大鳥卵剖之得一女子容色殊妙即以為妻其王尸羅劬傭伊說即其後也唐顯慶中遣使貢獻其俗無姓王居以柵為城以板為屋坐獅子座東面坐衣物與林邑同勝兵一萬餘人無馬有弓刀甲稍婚姻無同姓之別其食器有銅鐵金銀所食尚酥乳酪沙糖石蜜其家畜有殺羊水牛野獸有麋鹿等死亡無喪服之制以火

焚其屍其音樂略同天竺有波那婆宅護遮菴磨石榴  
等果多甘蔗從其國經薩盧都思訶盧君那盧林邑等  
國達於交州

哥羅舍分

哥羅舍分國在南海之南接墮和羅國勝兵二萬人其  
王蒲越伽摩唐顯慶五年遣使朝貢

占城

占城國在中國之西南東至海西至雲南南至真臘國

北至驩州外界海南去三佛齊五日程陸行至賓陀羅  
國一月程其國隸占城焉東去麻逸國二日程蒲端國  
七日程北去廣州便風半月程東北至兩浙一月程西  
北至交州兩日程陸行半月程其地東西七百里南北  
三千里南曰施備州西曰上源州北曰烏里州國無城  
郭有百餘村村落戶三五百或至七百亦有縣鎮之名  
土地所出箋沉香檳榔烏楠木蘇木白藤黃蠟吉貝花  
布絲絞布氎布藤簞貝多葉簞金銀鐵錠等物五穀無

麥有稭米粟豆麻子官給種一斛計租百斛果實有蓮

甘蔗蕉子椰子鳥獸多孔雀犀牛畜產多黃牛水牛而

無驢亦有山牛不任耕耨但殺以祭鬼將殺令巫祝之曰

阿羅和及狀譯之云早教他託生民獲犀象皆輸於

王國人多乘象或軟布兜或於交州市馬頗食山羊水

兕之肉其衣俗衣服與大食國相類無絲繭以白氎布

纏其胸垂至於足衣衫窄袖撮髮為髻散垂餘髻於其

後互市無緡錢止用金銀較量錙銖或吉貝錦定博易

之直樂器有胡琴笛鼓大鼓樂部亦列舞人其王腦後  
髻髻散披吉貝衣戴金花冠七寶裝纓絡為飾股脛皆  
露躡草履無韢婦人亦腦後撮髻無笄梳其服及拜揖  
與男子同王每午坐禪椅官屬謁見膜拜一而止白事  
畢復膜拜一而退或出游看象采獵觀漁皆數日方還  
近則乘軟布兜遠則乘象或乘一木杠四人舁之先令  
一人持檣榔盤前導從者千餘輩各執弓箭刀槍手牌  
等其民望之膜拜一而止日或一再出每歲稻熟王自

刈一把從者及羣婦女競割之其王或以兄為副王或以弟為次王設高官凡八員東西南北各二分治庶事無俸祿令其所管土俗資給之別置文史五十餘員有郎中員外秀才之稱分掌資儲寶化等事亦無資俸但給龜魚充食及免調役而已又有司帑廩者十二員主軍卒者二百餘員皆無月俸勝兵萬餘人月給秬米二斛冬夏衣布各三疋至五疋每夕唯王升牀而卧諸臣皆寢於地萼親近之臣見王即胡跪而禮稍疎遠者但

拱手而已其風俗正月一日牽象周行所居之地然後  
驅逐出郭謂之逐邪四月有遊船之戲定十一月十五  
日為冬至人皆相賀州縣以土產物帛獻其王每歲十  
二月十五日城外縛木為塔王及人民各以衣物香藥  
置於塔上焚之以祭天人有疾病旋采生藥服食地不  
產茶亦不知醞釀之法止飲椰子酒兼食檳榔刑禁  
亦設枷鎖小過以四人拽伏於地藤杖鞭之二人左右  
互扑量其犯罪或五六十至一百當死者以繩繫於樹用

梭槍舂喉而殊其首若故殺刼殺令衆踏之或以象卷  
撲於地象皆素習將刑人即令養養之人以數諭之悉  
能曉焉犯姦者男女共入一牛以贖死負國王物者以  
繩拘於荒塘物充而後出之其國前代罕與中國通周  
顯德中其王釋利因德漫遣其臣莆訶散貢方物有雲  
龍形通犀帶菩薩石又有薔薇水灑衣經歲香不散猛  
火油得水愈熾皆貯以琉璃餅建隆二年其王釋利因  
陀盤遣使莆訶散來表章書於貝多葉以香木函盛之

貢犀牙龍腦香藥孔雀四大食瓶二十使回錫賚有差以器幣優賜其王三年乾德四年開寶三年五年六年七年九年太平興國二年三年四年俱遣使入貢六年交州黎桓上言欲以占城俘九十三人獻於京師太宗令廣州止其俘存撫之給衣服資糧遣還占城詔諭其王七年八年俱入貢雍熙二年遣使入貢且訴為交州所侵詔答令保國睦鄰三年入貢儋州言占城人蒲羅邊為交州所逼率其族百口來附四年秋廣州上言

雷恩州開送占城人夷斯當李娘并其族一百五十人來  
歸分隸南海清遠縣端拱元年廣州又言占城夷人忽  
宣等族三百一人來附淳化元年遣使貢方物且訴為  
交州所攻國中人民財寶皆為所掠上賜黎桓詔令各  
守境三年遣使貢方物至道元年其王遣使來朝貢奉  
表詞甚恭順且言臣本國元有流民三百散居南海曾  
蒙聖旨許令放還今有猶在廣州者本國舊有進奉夷  
人羅常占見駐廣州乞詔本州盡數點集令舶船乘便

風部領歸國上覽表詔遣使廣州詢問願還者悉復使  
回復賜良馬二遂為常制咸平二年景德元年俱入貢  
詔以良馬介冑戎器賜之四年遣使奉表來朝表函籍  
以文錦其使言本國舊隸交州後奔於佛逝北去舊所  
七百里使還賜物甚厚大中祥符三年來貢四年又遣  
使貢獅子詔畜於苑中使者留二蠻人以給養上憐  
其懷土厚給資糧遣還八年天禧二年並遣入貢三  
年其使還詔賜國王銀四千七百兩并戎器鞍馬海上又

有蒲端國三麻蘭國勿巡國蒲婆衆國太平祥符四年  
祀汾陰並遣使來貢蒲端國王上言伏見詔旨給賜占  
城使鞍勒馬大神旗各各乞如恩例有司以蒲端在占  
城下請賜雜綵小旗五從之天聖八年入貢慶歷二年  
獻馴象皇祐二年貢方物表二通一以蕃書一以中國  
書五年嘉祐元年俱入貢六年獻馴象七年正月廣西  
經畧司言占臘素不習兵與交趾鄰常苦侵軼而占城  
復近脩武備以抗交趾將繇廣東路入貢望撫以恩信

五月入貢賜白馬二熙寧元年入貢乞市騾馬詔賜白馬一令於廣州置騾以歸五年貢方物七年交趾李乾德言其王領兵三千人并妻子來降且言其國自海道抵真臘一月程西北抵交州四十日皆山路所治聚落一百五大略如州縣後討交趾以其素仇遣使詔以乘機協力蕩除使還言其國選兵七千扼賊要路其王以木葉蕃書回牒詔使上之然亦不能成功後兩國同入貢占城使者乞避交人詔遇朔日朝文德殿分東西立

望日則交人入垂拱而占城趨紫宸大燕則東西坐元祐七年又表言如天朝討交趾願率兵掩襲朝廷以交趾數入貢不絕臣節難以興師答敕書報之而以其使良保故倫軋丹副使傍木知突為保順郎將政和中授其王楊卜麻疊金紫光祿大夫領兼白州刺史卜麻疊言身縻化外不需祿食願得薄受俸給壯觀小蕃許之宣和元年進檢校司空兼御史大夫懷遠軍節度使琳州管内觀察處置等使封占城國王自是每遇郊恩輒

降制加封邑其州所統大小州三十八通不盈三萬家  
甃磚為城護以石塔其戎器以標鎗膀牌竹為弓無翎  
箭戰則五人為甲走則同甲皆坐山多香木每歲官監  
民入山斫香輸官謂之身丁香如中國身丁鹽稅之類  
納足聽民貿易商舶到其國則差蕃官摺黑皮為策書  
白字抄物數監盤上岸十取其二外聽交易建炎元年  
國王入貢遇郊恩制授檢校太傅加食邑後以為常紹  
興二十五年其子鄒時巴蘭嗣立貢方物求封爵詔授

以其父官乾道三年其子鄒亞娜遣使入貢詔受其獻  
十分之一既而福建市舶司言大食國人烏師點等訴  
占城入貢即所奪本國物上以爭訟却之詔學士院答  
敕洪邁引崇寧故事乞用金花綾紙寫詔禮部郎中李  
燾上言當從紹興二十五年例用白藤紙況今進貢非  
實却而不受豈宜更優其禮上曰李燾之論有理即用  
近例邁以為侵官自是與燾有隙臣僚亦言鄒亞娜承  
襲若以禮入貢則當議封既與大食爭訟難即降詔俟

再貢如禮然後賜命乾道七年閩人有泛海官吉陽軍者飄至占城見其國與真臘乘象以戰無大勝負乃說王以騎戰教之弓弩騎射其王大悅具舟送之吉陽厚賫隨以買馬得數十足以戰則克次年復來人徒甚盛瓊州不受怒歸肆行劫掠淳熙二年詔帥臣張栻草書付瓊管司諭以中國馬自來不許出外界令還所掠人口等自今不得生事知吉陽軍林寶慈令王三俊指引占城國人買馬圖利令本司取勘具奏三年占城發回

所掠人口見存八十三人又申乞與本蕃通商詔牒行  
下瓊管司朝廷加惠外國各已有市舶司主管交易海  
南四郡即無通商條令仰遵依自來體例施行淳熙四  
年五月以舟師襲真臘請和不許殺之遂為大讐慶元  
己未真臘大舉入占城俘其主戮其臣僕勦殺幾無噍  
類更立真臘人為主

### 三佛齊

三佛齊國蓋南蠻之別種與占城為鄰間於真臘閣婆

之間所管十五州土產紅藤紫鈿箋沉香檳榔子無緡  
錢土俗以金銀貿易諸物四時之氣多熱少寒冬無霜  
雪人用香油塗身其地無麥有米及青白豆鷄魚鵝鴨  
頗類中土有柳花酒椰子酒檳榔酒皆非麴蘖所醞飲  
之亦醉樂有小琴小鼓毘奴踏曲為樂國中文字用  
蕃書以其王指環為印亦有中國文字上章表即用焉  
累甃為城周數十里用椰葉覆屋人民散居城外不輸  
租賦有所征伐隨時調發立酋長率領皆自備兵器糧

糗汎海便風二十日至廣州如泉州舟行順風月餘亦可到國人多姓蒲習水陸戰臨敵敢死伯於諸國其國在海中扼諸蕃舟車往來之咽喉若商船過不入即出船合戰期以必死故諸國之舟輻湊焉唐天祐元年貢方物授其使都蕃長蒲訶栗寧遠將軍宋建龍元年九月其王悉利胡大霞里檀遣使李遮帝來朝貢二年夏又遣使貢方物是冬又來貢其國別號先留王李犀林男迷日來亦遣使同至貢方物三年又遣使來貢回賜

以白犂牛尾白瓷器髹器錦綵鞍轡二副開寶四年遣

使以水晶火油來貢五年又來貢七年又貢象牙乳香

薔薇水萬年棗偏桃白沙糖水水晶指環琉璃瓶珊瑚樹

八年又遣使入貢賜以冠帶器幣太平興國五年入貢

雍熙二年端拱二年俱入貢淳化三年冬廣州言三佛

齊朝貢使蒲抑陀黎前年自京回聞本國為闍婆所侵

住南海凡一年今春乘舶至占城風信不利復還乞降

詔諭本國從之咸平六年遣使來貢且言本國建佛寺

以祝聖壽願賜名及鐘上嘉其意詔以承天萬壽為寺額并鑄鐘以賜來使俱授以官大中祥符元年其王遣使來貢詔許赴泰山陪位於朝覲壇遣賜甚厚天禧元年遣使奉金字表貢珍珠象牙梵夾經崑崙雙使還賜禮物獎慰之天聖六年其王遣使入貢舊制蕃國使入貢賜以間金塗銀帶時特以渾金帶賜之熙寧十年使大首領地華伽囉來以為保順慕化大將軍賜詔寵之元豐中使至者再率以白金真珠婆律薰陸香備方物

廣州受表入言俟報乃護至闕下天子念其道里遠每  
優賜遣歸二年賜錢六萬四千緡銀萬五百兩官其來  
使乞買金帶白金器物及僧紫衣師牒皆如所請給之  
五年廣州南蕃綱首以其主管國事國王之女唐字書  
寄龍腦及布與提舉市舶孫迥迥不敢受言於朝詔令  
估直輸之官而市采帛以報元祐三年遣使入見以金  
蓮花真珠龍腦撒殿官其來使六年及紹聖中再入貢  
紹興七年有司議三佛齊國王敕告綾紙並欲用黃色

餘依所賜大食國例從之二十六年復入貢乾道八年  
國王書乞將銅塔船僱人造瓦回蕃詔從之自後不許  
淳熙五年來貢方物乞比占城進奉例回賜從之詔免  
到闕令泉州管待章表遞奏其子稱乾道四年承襲乞  
依舊封爵詔襲其父舊封仍賜襲衣金帶鞍馬幣帛有  
差

勃泥

勃泥國在京都之西南大海中去闍婆四十五日去三

佛齊四十日程去占城與摩逸各三十日程皆計順風  
為則其國以板為城城中居者萬餘人所統十四州其  
王所居屋覆以貝多葉民舍覆以草在王左右者為大  
人王坐繩床若出即大布單坐其上衆舁之名曰阮囊  
戰鬪者則持刀被甲甲以銅鑄狀若大筒穿之於身護  
其腹背其地無麥有麻稻又有羊皮雞魚無蠶絲用吉  
貝花織成布飲椰子酒婚聘之資先以椰子酒檳榔次  
之指環又次之然後以吉貝布或量出金銀成其禮喪

葬亦有棺歛以竹為輦載棄山中二月始耕則祀矣以十二月七日為歲節地熱多風雨國人宴會鳴鼓吹笛擊鉦歌舞為樂無器皿以竹編貝多葉為器盛食食訖棄之其國隣於底門國有藥樹取其根煎為膏服之及塗其體兵刃所傷皆不死前代未嘗朝貢故史籍不載宋太平興國二年其王向打遣使貢表貢大片龍腦光龍腦蒼龍腦玳瑁檀香象牙其表以數重小囊緘封之非中國紙類木皮薄瑩滑色微綠而長數尺濶寸餘橫

卷之僅可盈握其字小細橫讀之以華言譯之云勃泥

國王向打稽首拜皇帝萬歲萬歲萬歲萬歲願皇帝萬歲  
今遣使進貢向打聞朝廷無路得到昨有蕃人蒲蘆歇  
泊水口令人迎到州言自中朝來比詣闕婆國遇猛風  
吹其船不得去此時聞自中國來人皆大喜即造船船令  
蒲蘆歇導達入貢朝所遣使人只願平善見皇帝每  
年令人入朝每年修貢慮風吹至占城界望皇帝詔占  
城令有向打船到不得留臣本國別無異物乞皇帝勿

怪其表文如是詔館其使於禮賓院優賜以遣之元豐五年二月其王錫理麻喏復遣使貢方物其使乞從泉州乘海舶歸國從之

注輦

注輦國東距海五千里西至西天竺千五百里南至羅蘭二千五百里北至頓田三千里自古不通中國水行至廣州約四十一萬一千四百里其國有城七重高七尺南北十二里東西七里每城相去百步凡四城用磚

二城用土最中城以木為之皆植花果雜木其第一至第三城皆民居環以小河第四城四侍郎居之第五城主之四子居之第六城為佛寺百僧居之第七城即主之所居屋四百區所統有三十一部落其西十二其南八其北十一今國主相傳三世矣民有罪即命侍郎一員處治之輕者繫於木格笞五七十至一百重者則斬或以象踐殺之其宴則國主與四侍郎膜拜於階遂共坐作樂歌舞不飲酒而食肉俗衣布亦有餅餌嘗饌執

事有婦人其嫁娶先用金銀指環使媒婦至女家後三日會男家親族約以土田生畜櫝榔酒等稱其有無為禮女家復以金銀指環越諾布及女所服錦衣遺壻若男欲離女則不取聘財女欲却男則倍償之其兵陣用象居前小牌次之梭槍次之長刀又次之弓矢在後四侍郎分領其衆國東南約二千五百里有悉蘭池國或相侵伐地產真珠象珊瑚玻璃櫝榔豆蔻吉貝布獸有山羊黃牛禽有山雞鸚鵡果有餘甘藤蘿千年棗椰子

甘羅崑崙梅婆羅蜜之類花有白茉莉散絲蛇臍佛桑  
麗秋青黃碧婆羅瑤蓮蟬紫水蕉之類五穀綠黑豆麥  
稻地宜竹自昔未嘗朝貢宋大中祥符八年九月其國  
主羅茶羅乍遣進奉使侍郎婆里三文副使蒲加心判  
官翁勿防援官亞勤加等奉表來貢三文等以盤捧真  
珠碧玻璃升殿布於御坐前降殿再拜譯者導其言曰  
願以表遠人慕化之意其國主表曰臣羅茶羅乍言昨  
遇舸舶船商人到本國告稱鉅宋之有天下也二帝開

基聖人繼統登封大嶽禮祀汾陰至德升聞上穹眷命  
臣昌期斯遇古語幸聞輒傾就日之誠仰露朝天之款  
臣伏聞人君之御統也無遠不臻臣子之推誠也有道  
則服伏惟皇帝陛下功超邃古道建大中衣裳垂而保  
合乾坤劍戟鑄而範圍區宇神武不殺人文化成廓明  
明之德以臨御下民懷翼翼之心以昭事上帝至仁不  
傷於行葦大信爰及於淵魚故得天鑒孔彰帝臨有赫  
顯今古未聞之事保邦家大定之基竊念臣微類醯雞

賤如芻狗世居夷落地遠華風虛荷燭幽曾無執贄今  
者竊聽謌頌普及遐邇限年屬於桑榆阻躬陳於玉帛  
矧滄溟之曠絕在跋涉以稍難是敢傾倒赤心遙瞻丹  
闕任土作貢同螻蟻之慕羶委質事君比葵藿之向日  
謹遣專使等五十二人奉土物朝貢凡真珠衫帽各一  
真珠二萬一千一百兩象牙六十株乳香六十斤三文等  
又獻珠六千六百兩香藥三千三百斤初羅茶羅乍既  
聞商舶言且曰十年來海無風濤古老傳云如此則

中國有聖人故遣三文等入貢三文離本國舟行七十

七晝夜歷那勿丹山婆里西蘭山至占賓國又行六十

一晝夜歷伊麻羅里山至古羅國國有古羅山因名焉

又行七十一晝夜歷加八山古不牢山舟寶龍山至三

佛齊國又行十八晝夜度蠻山水口歷天竺山至賓頭

狼山望東西王母塚距舟所將百里又行二十晝夜度

羊山九星山至廣州之琵琶洲離本國凡千一百五十

日至廣州焉詔閣門祇候史祐之館伴凡宴賜恩例同

龜茲使其年承天節三文等請於啓聖禪院會僧以祝  
聖壽明年使廻降詔羅茶羅卞賜物甚厚天僖四年又  
遣使琶欄得麻烈吒奉方物入貢至廣州病死守臣以  
其表聞詔廣州宴犒從者厚賜以遣之明年二年其王  
遣使以泥金表進真珠衫帽及真珠一百五兩象牙百  
株其使自言數朝貢而海風破船不達願將上等珠就  
龍床脚撒殿頂戴瞻禮以申向慕之誠乃奉銀盤升殿  
跪散珠於御榻下而退景祐元年以其使蒲押陀離為

金紫光祿大夫懷化將軍還本國熙寧十年復遣二十  
七人來獻豌豆珠麻珠瑠璃大洗盤生白梅花腦錦花  
犀牙乳香瓶香薷薇水金蓮花木香阿魏鵬砂丁香使  
副以真珠龍腦登殿跪而散之謂之撒殿既降詔遣御  
藥宣勞之以使為懷化將軍保順郎將各賜衣服器幣  
答賜其王錢八萬一千八百緡銀五萬二千兩

按注輦國水行至廣州約四十一萬一千四百里  
凡千一百五十日而至其去中國最遠又自古未

嘗相通至大中祥符間始入貢然其表文叙述有理詞采可觀略無島夷侏離鄙俚之談有類中土操觚文士之筆高麗交趾反所不逮竊疑史文容有緣飾非其實也

州眉流

州眉流國東至真臘五十程南至羅越水路十五程西至西天竺三十五程北至程良六十程東北至羅斛二十五程南至闍婆四十五程西南程若十五程西北至

洛華二十五程東北至廣州三十五程其俗以板為屋  
跣足衣布無紳帶以白紵纏其首貿易以金銀其主所  
居廣袤五里無城郭出則乘象車亦如小駟地出犀象  
瑜石紫鈿蘇木諸藥四時炎熱無霜雪未嘗至中國宋  
咸平四年國主多湏機遣使打古馬副使打臘判官劄  
皮泥等九人來貢木香千斤瑜鑽各百斤胡黃連三十  
五斤紫鈿百斤紅氈一合花布四段蘇木萬斤象牙六  
十一株召見崇德殿賜以冠帶服物及還又賜多湏機

詔書以敦獎之

蒲甘

宋崇寧五年蒲甘遣使入貢詔禮秩視注輦尚書省言  
注輦役屬三佛齊故熙寧中敕書以大背紙緘以匣襍  
今蒲甘乃大國蕃王不可下視附庸小國欲如大食交  
趾諸國禮凡制詔並書以白背金花綾紙貯以間金鍍  
匣銀管簫用錦絹夾襍緘封以往從之

南毗

南毗國在西南自三佛齊便風月餘可到國多風王出  
先差官及兵卒百餘人持水灑地以防颶風播揚精飲  
食鼎以百計日一易之有官名翰林供王飲食喜戰鬪  
善刀鞘習弓箭鑿雜白銀為錢鏤官印記民用以貿易  
土產珍珠諸色番布其國最遠番舶罕到有時羅巴智  
力于父子其種類也入居泉之城南自是船舶多至其  
國矣

層檀

層檀國在南海傍城距海二千里宋熙寧四年始入貢海道便風行百六十日經勿巡古林三佛齊國乃至廣州其王名亞美羅亞眉蘭傳國五百年十世矣人語音如大食地春暖貴人以越布纏頭服花錦白疊布出入乘象馬有俸祿其法輕罪杖重死穀有稻粟麥食有魚畜有胡羊山羊沙牛水牛橐駝馬犀象藥有木香血竭沒藥鵬砂阿魏黨陸產珍珠玻璃密沙華三酒交易用錢官自鑄三分其齊金銅相半而銀居一分禁民私鑄

元豐六年使保順郎將層伽尼再至神宗念其絕遠詔  
頒賚如故事仍加賜白金二千兩

文獻通考卷三百三十二



總校官庶享臣張能照

校對官檢討臣盧應

謄錄監生臣錢璣

欽定四庫全書薈要

史部

文獻通考卷三百三十三



欽定四庫全書薈要卷九千六百五十五

史部

文獻通考卷三百三十三

鄱陽馬端臨貴與著

西

四裔考十

杜氏通典邊防序略曰西羌出自三苗蓋姜姓也其

國近衡山

今長沙衡陽零陵江華等郡地

及舜徙之三危

三危山在今燉煌郡

燉煌縣界

漢金城之西南羌地是也

今金城會寧安鄉西平等郡之西南地

濱於賜支

續漢書云河關西可千餘里有河曲羌謂之賜支蓋析支也按漢河關縣屬金城郡

則今安鄉郡也其賜支在其西又按風俗通云羌者其先本戎賤主牧羊故羌字從羊

至於河

首綿地千里南接蜀漢徼外蠻夷西北鄯善車師諸

國所居無常依隨水草地少五穀產牧為業其俗氏

族無定或以父名母姓為種號妻後母納嫠嫂離音

如北狄之俗故國無鰥寡種繁熾

廣志云羌與北狄同其人魯鈍饒妻

妻多子姓一人生子數十或至百人嫁女得高貴者聘至百犢女披大華氍以為盛服一狗皮直數十兩

在古不立君臣無相統一強則分種為酋豪弱則為

人附落更相抄掠以力為雄殺人償死無他禁令其  
兵長在山谷短於平地不能持久而果於觸突以戰  
死為吉利病終為不祥甚耐寒苦同之禽獸昔夏啓  
之子太康失國四夷皆叛及后相立乃征畎夷即犬戎也  
夷者四蕃之總號七年然後來賓至於后泄始加爵命由是

服從

泄啓八代孫帝芒之子

后桀之亂畎夷入居邠岐之間

今邠

新平郡岐今扶風郡

成湯既興伐而攘之及殷室中衰諸戎皆

叛至於武丁征西戎鬼方克之

武丁高宗易曰高宗伐鬼方也後漢史西

羌傳云武丁征西戎鬼方三年乃克故其詩曰自彼  
氏羌莫敢不來王言因高宗討伐然後氏羌朝享按  
商頌曰捷彼殷武奮伐荆楚衆入其阻褒荆之旅言  
殷道衰荆楚背叛高宗能出兵伐之美其功也又曰  
惟汝荆楚居國南鄉昔有成湯自彼氏羌莫敢不來  
享莫敢不來王言成湯之時遠夷西方氏羌之國皆  
來朝見汝居中國之南方乃背叛乎此責之之辭非  
謂高宗時氏羌也時高宗亦伐荆楚蔚宗不詳誤引  
此詩已附合也又按竹書周王季伐西落鬼戎後漢  
章帝紀有司徒明帝功德又云克伐鬼方開通西域  
則鬼方宜是西羌也或云鬼陰類鬼方即  
北方斯乃臆斷諸家因謂之北狄誤矣 及武乙暴

虐犬戎寇邊周古公踰梁山

在今好時縣西北

而避於岐下

在今扶風郡界 及王季遂伐西落鬼戎

竹書紀年曰武乙三十五年周王季伐西

落鬼戎

自是之後更伐始呼翳徒之戎皆克之

竹書紀年曰文

丁七年周人伐始呼之戎捷其三大夫也

及武王伐商羌髡率師

髡音矛

會

於牧野至穆王時戎狄不貢王乃西征犬戎獲其五

王遂遷戎於太原夷王衰弱及宣王立召秦莊公興

兵伐破之其後侵盜不已至幽王昏虐西戎寇周殺

幽王於驪山

驪山今京兆府界

周乃東遷洛邑及平王之末

周遂陵遲戎逼諸夏自隴山以東及乎伊洛往往有

戎於是渭首有狄獯邽冀之戎

狄獯並今隴西郡邽冀並今天水郡獯音

桓邽 涇北有義渠之戎

音珪 今安化郡地

洛川有大荔之戎

今洛

交中部郡地

渭南有驪戎

即今昭應縣

伊洛間有楊拒泉臯之

戎 潁洛以西有蠻氏之戎

今潁川郡地

間在中國與諸夏

盟會後晉滅驪戎

今昭應縣

是時伊洛戎強東侵曹魯襄

王時秦晉自瓜州

今燉煌晉昌郡地

遷陸渾之戎於伊川允

姓之戎遷於渭汭

允姓陰戎之祖與三苗俱放三危即瓜州也至襄王時魯僖公之二

十二年秦晉遷洛渾之戎於伊川本在秦晉西北二  
國誘而徙之遂從戎號至今為陸渾縣焉水口曰汭  
今京兆府北新平彭原之間一云  
汭在新平宜祿縣亦有宜祿水  
東及輶輳  
今河南府陽翟

縣界

在河南山北者號曰陰戎

河南山北自今上洛郡以東至陸渾

秦穆

公得戎人由余遂霸西戎開地千里

由余其先晉人亡入戎

及

晉悼公又使魏絳和諸戎復脩霸業其後陰戎之種

遂以滋廣與晉伐周

左傳魯昭公九年晉大夫梁丙率陰戎以伐潁潁周邑陰戎即

陸渾戎也景王使詹桓伯責晉平公曰允姓之姦居於瓜州伯父惠公歸自秦而誘以來使偪我諸姬入我郊甸戎有中

國晉之咎也後陸渾戎叛晉荀吳滅之後楚執蠻

氏而盡囚其人至周貞王八年秦厲王滅大荔取其地趙亦滅北戎韓魏後稍并伊洛陰戎滅之其遺脫

者皆走西踰汧隴

汧音牽

自是中國無戎寇唯餘義渠

種焉是為強盛屢為人患及昭王起兵滅之始置隴

西

今天水隴西金城會安寧鄉河池和政等郡地

北地

今安定彭原安化平涼靈武寧朔及五原

等郡

上郡焉

今上郡洛交銀川新泰朔方中部延安咸寧等郡地戎本無君長夏后氏末及

商周之際或從侯伯征伐有功天子爵之以為蕃服春秋時陸渾蠻氏戎稱子戰國時大荔義渠稱王及其衰亡餘種皆反舊為酋豪

始皇兵務東向故得繁息秦平天下

蒙恬西逐諸羌出塞漢初尚微弱景帝時研種求徙

於狄道安故

今金城郡縣

武帝又西逐渡河湟初開河西

置四郡

今武威張掖酒泉燉煌等郡地

其後先零種園枹罕

今安鄉郡縣零

音憐枹音浮

漢兵擊平之始置護羌校尉至宣帝代又寇

金城

今金城會寧西平安鄉等郡地

趙充國立屯田且討且招降者

三萬餘人置金城屬國以處之自後賓服後漢光武

建中初寇金城馬援討破降之徙七千口於三輔

今京

兆馮翊扶風沂陽等郡地

和帝以後又反叛豪滇零稱天子南入

益州

今漢川漢中等郡地

東犯趙魏

今趙魏鄴等郡地也

寇及雍城

今河內郡

北故城也

十餘年然後破散順帝永和中又叛漢將馬賢

戰歿後段頽窮討及靈帝末方始平定自光武以後  
匈奴少事唯西羌屢梗焉魏晉二代時亂關隴不至  
大傷害永嘉以後吐谷渾興焉本遼東鮮卑晉時數  
百戶西附於陰山屬晉亂遂吞併諸羌而有其地至  
其孫葉延遂為強國後魏末其主夸呂自號可汗建  
官多效中國洎隋煬帝遣觀王雄大破之其主伏允  
遠遯收其地列置郡縣鎮戍後轉衰弱唐初吐蕃始  
興焉其帥後魏末自臨松郡丞故其主有贊府之號

後魏臨松郡今張掖郡張掖縣

高宗時遂滅吐谷渾盡有其地將軍

薛仁貴等大敗於大非川儀鳳中工部尚書劉審禮  
又率兵十八萬敗歿於青海調露中中書令李敬元  
又大敗於大非川武太后如意初王孝傑方大破之  
始復龜茲等鎮萬歲通天初又寇梁州都督許欽明  
戰歿因贊府殺其名將論欽陵之後累破敗遂劣於  
曩時矣

羌無弋

羌無弋爰劍者秦厲公時為秦所拘執以為奴隸不知  
爰劍何戎之別也後得亡歸而秦人追之藏於巖穴中  
得免與剽女遇合於野女恥其狀被髮覆面羌人因以  
為俗遂俱亡入三河間

三河即黃河析支河湟中河諸  
今金城隴西安鄉郡之西南

羌共畏事之推以為豪以射獵為事爰劍教之田畜種  
人依之者益眾羌人謂奴為無弋以爰劍嘗為奴隸故  
因名之其後世世為豪至爰劍曾孫恣時秦獻公初立  
欲復穆公之迹

穆公霸有西  
戎今欲復

恣季父邛畏秦之威將其

衆種人附落而南出析支河曲西數千里與羌絕遠不

復交通其後子孫分別各自為種任隨所之或為羗牛

種越雋羌是也

今越雋地

或為白馬種廣漢羌是也

今梓潼遂寧以

西德陽郡地

或為參狼種武都羌是也

今武都郡

忍及弟舞獨留

湟中忍生九子為九種舞生十七子為十七種羌人興

盛從此起矣及忍子研立研豪健故羌中號其後為研

種秦始皇時兵務東向故種人得以繁息秦既兼天下

使蒙恬將兵略地西逐諸戎北却衆狄築長城以界之

至漢景帝時研種留何率種人求守隴西塞

今天水隴西等郡地

於是徙留何等於狄道安故至臨洮氏道羌道

並今隴西金城

安鄉臨洮等郡

及武帝征伐四夷又西逐諸羌乃渡河湟築令

居塞

在今西平郡西北

初開河西列置四郡

酒泉武威張掖燉煌並今郡

通

道玉門隔絕羌胡於是障塞亭燧出長城外數千里時

先零羌與封養牢姐種解仇結盟

姐音紫

與匈奴通合兵

十餘萬共攻令居安故

地在今金城郡

遂圍枹罕漢遣將軍李

息將軍討平之始置護羌校尉統領焉羌乃去湟中依

西海鹽池之左右

今酒泉郡之北千餘里鹽池

漢遂因山為塞河西

地空稍徙人以實之至宣帝時諸羌又相與解仇寇攻

金城帝遣後將軍趙充國將兵討之充國欲以屯田於

臨羌東至浩疊

浩疊縣即今金城郡廣武縣地浩音閤疊音門臨羌縣在西平郡界

務威

信招降罕开及刼掠者解散虜謀乃擊之

开音牽

時已發

諸郡兵六萬人酒泉太守辛武賢奏言請即擊之天子

下書令充國博議往返者三四遂兩從其志武賢出擊

羌降破數千人詔罷兵獨充國留屯田明年五月充國

奏言羌本可五萬人軍凡斬首七千六百級降者三萬一千二百人溺湟饑死者五六千人定計遺脫與煎鞏

黃羗

並各是羌種

俱亡者不過四千人初置金城屬國以處

降羌從爰劍種五世至研研最豪健自後以研為種號

十三世至燒當復豪健其子孫更以燒當為種號自元

帝以後數十年四夷賓伏邊塞無事至王莽末豪滇良

內侵

燒當玄孫

及後漢初遂寇金城隴西司徒掾班彪上言

今涼州部郡

時涼州部除三輔外今安定平涼郡之西天水隴西諸郡悉屬焉

皆有降

羌被髮左衽而與漢人雜處習俗既異言語不通數為  
小吏黠人所見侵奪窮恚無聊故致反叛夫蠻夷寇亂  
皆為此也請依舊制益州部

今漢川巴屬川  
即當時益州是

置蠻夷騎

都尉幽州部

今范陽上谷安邊及漁  
陽北平即當時幽州

置領烏桓校尉涼

州部置護羌校尉皆持節領護理其怨結歲時循行問  
其疾苦又數遣使驛通導動靜使塞外羌夷為吏耳目

州部因此可得倣備今宜復如舊以明威防光武從之  
即以牛邯為護羌校尉及邯卒而職省建武十一年先

零種寇臨洮

今和政郡地

隴西太守馬援破降之後徙置天

水

今郡地

隴西

今隴西及金城郡南境地是

扶風三郡

今扶風汧陽新平等郡地皆是

自燒當至滇良世居河北大允谷後徙大小榆中

榆中在今

金城西平等郡之間

由是始強至於子滇吾永平初漢遣中郎將

竇固等擊破降之徙七千口置三輔而滇吾諸弟迷吾

等數為寇盜章帝時馬防等討破之於臨洮索西迷吾

等悉降防乃築索西城

在今和政郡界是

自後或降或叛少有

寧歲和帝時迷吾子迷唐復將兵向塞金城守候霸及

諸郡率兵破之羌衆折傷種人瓦解迷唐遂孤弱不滿

千人遠踰賜支河首

即析支河

依發羌居明年安定降羌燒

何種脇諸種數百人反叛

安定郡今安定平涼會寧郡東境是

郡兵擊滅

之時西海及大小榆左右無復羌寇隃麋相曹鳳上言

隃麋縣名在今沂陽郡界隃音俞

西戎為害前世所患臣且以近事言

之自建武以來其犯法者常從燒當種起所以然者以

其居大小榆土地肥美又近塞內諸種易以為非難以

攻伐南得種存

種存別種羌

以廣其衆北阻大河因以為固

又有西海魚鹽之利緣山濱水以廣田畜故能强大常

雄諸種恃其權勇招誘諸胡今者衰困黨援壞沮親屬

離叛餘勝兵者不過數百流亡逃竄遠依發羌臣愚以

為宜及此時建復西海郡縣

漢武遂諸羌置西海郡在今酒泉郡北千二百里欲

復立規固二榆廣設屯田隔塞羌胡交關之路遏絕狂

狡窺欲之源又殖穀富邊省委輸之役國家可以無一

方之憂於是拜鳳為金城西部都尉將徙徙出屯龍耆

龍耆即龍支

後金城長史上官鴻開置歸義建威屯田

今西平郡縣

二十七部侯霸復上置東西邯屯田五部

邯水名也分  
流左右在今

寧塞  
郡

增逢留二部帝皆從之列屯夾河合四十部其功

垂立至永初中諸郡羌叛乃罷迷唐失衆病死有一子

來降戶不滿數十滇吾曾孫麻奴初隨父東號降居安

定時諸降羌布在郡縣皆為吏人豪右所徭役積滿愁

怨安帝永初九年麻奴兄弟因此遂與種人俱西出塞

先零別種歸湍豪滇零與衆羌大為寇掠

湍奴  
感反

征西校

尉任尚率諸郡兵與滇零兵戰於平襄

地在今  
天水郡

尚軍大

敗於是滇零自稱天子於北地招集武都參狼上郡西

河

今西河銀川昌化郡

諸雜種衆遂大盛東犯趙魏南入益州遂

寇鈔三輔斷隴道湟中諸縣粟石萬錢百姓死亡不可

勝數諸郡屯兵救之三輔

三輔即京兆扶風馮翊也今京兆扶風汧陽馮翊等郡地

衆羌乘勝漢兵數挫當前勒姐種攻沒破羌縣

今西平郡湟水

縣種羌又沒臨洮

今和政郡和政縣界

軍營久出無功有廢農桑

乃詔任尚將吏兵還屯長安置京兆虎牙都尉於長安

扶風都尉於雍

今扶風郡縣

如西京三輔故事至四年大將

軍鄧騭議欲棄涼州虞翊曰不可今羌所以不可入據  
三輔為心腹之害者以涼州在後故也其土人所以摧  
鋒無反顧之心者為臣屬於漢故也若棄其境域徙其  
人衆安土重遷必生異志如使雄豪相聚席卷而東雖  
虎賁為卒白起太公為將亦恐不足禦當今之計者宜  
令四府九卿各辟彼州數人其牧守令長子弟皆除為  
冗官外以勸勵答其功勤內以拘致防其邪計誠能如  
此則可無患於是四府皆從翊議時漢中太守鄭勤戰

死羌勢轉盛遂徙金城郡居襄武

漢金城郡理允吾縣地今郡廣武縣漢襄

武縣屬隴西縣地即今隴西郡縣是

羌衆入寇河東至河內百姓相驚多

南奔渡河使北軍中候朱寵將五營士屯孟津詔魏郡

今魏郡等郡地

趙國

今趙郡地

常山

今郡地

中山

今博陵郡地

繕作塢堠六

百一十六所羌既轉盛而二千石令長多內郡人並無

守戰意皆爭上徙郡縣以避寇難朝廷從之遂移隴西

徙襄武

漢隴西郡理狄道縣地即今金城郡縣

安定徙美陽

漢安定郡理臨涇縣地在

今郡縣也漢美陽縣屬右扶風地在今京兆府三原縣

上郡徙衙

上郡理膚施縣地在今上郡隴

泉縣漢衙縣屬左馮翊地今是白水縣

百姓戀土不樂去舊遂乃刈其禾

稼發撤室屋夷營壁破積聚時連旱蝗饑荒而驅蹙劫掠流離分散隨道死亡咸棄捐老弱或為人僕妾喪其

太半滇零死子零昌立元初元年遣兵屯河內

今郡地通

谷衝要三十三所皆為塢壁設鳴鼓零昌進兵寇雍城

今河內郡地

遣任尚為中郎將將羽林緹騎五營子弟屯三

輔尚臨行懷令虞詡說尚曰

懷縣今河內郡武陟縣地也

使君頻奉

國命討逐寇賊三州屯兵二十餘萬人棄農桑疲苦從

役未有效勞費日滋若此出不尅誠為使君危之尚  
曰憂惶久矣詡曰兵法弱不攻強走不逐飛自然之勢  
也今虜皆馬騎日行數百來如風雨去如絕弦以步追  
之勢不相及所以曠日無功也為使君計者莫若罷諸  
郡兵令出錢數千二十人共市一馬如此可捨甲冑馳  
輕兵以萬騎之衆逐數千人之虜首尾掩截其道自窮  
使人利事大功立矣尚即上言用其計乃遣輕騎鈔擊  
斬首數百級明年秋漢又築馮翊北界

今馮翊之北  
洛交以南

候

塢五百所自後頻破之諸羌瓦解三輔益州

益州今洋川漢中等

郡之地

無復寇警自羌叛十餘年間兵連師老不暫寧息

軍旅之費轉運委輸用二百四十餘億府帑空竭

帑他朗反

延及內郡邊人死者不可勝數并涼二州遂至虛耗

并州

部領上郡朔方五原西河太原雲中定襄鴈門代郡上黨等郡今上郡中部延安咸寧洛交銀川新秦朔方九原榆林西河昌化太原樓煩鴈門定襄安邊馬邑雲中上黨樂平等郡地也按秦地除三輔屬司隸外並屬涼州

自後隴西上郡武威張掖仍寇盜不息

上郡今上郡中部延安咸

寧等郡地武威張掖並今郡地

順帝永建四年尚書僕射虞詡上疏曰

臣聞禹貢雍州之域厥田惟上上且沃野千里穀稼殷

積又有龜茲鹽池以為人利

漢上郡龜茲縣有鹽池在今上郡銀川之間

水

草豐美土宜產牧北阻山河乘阨據險因渠以溉水春

河漕

水春即水碓也河漕通船運也

用功省少而軍糧饒足故孝武皇

帝及光武築朔方

朔方即今郡

開西河置上郡皆為此也而

元元被災衆羌內潰郡縣兵荒二十餘年夫棄沃壤之

饒捐自然之財不可謂利離山河之阻守無險之處難

以為固今三郡未復

前因羌寇徙隴西安定北地上郡四郡之人今言復三郡者當為隴

西理襄武捍蔽京師尚遠不要更移餘三郡須復本處是園陵單外園陵謂長安諸陵園也單外謂

無守也而公卿容頭過身但計所費不圖其安宜開聖聽

考行所長書奏帝乃復三郡使謁者郭璜督促徙者各

歸舊縣繕城郭置候驛既而激河浚渠為屯田省內郡

費歲一億計遂令安定北地及隴西金城北地今彭原安

化靈武五原寧朔等郡地常儲穀粟令周數年至陽嘉元年以湟中

地廣更增置屯田五部并前為十部二年復置隴西南

部都尉如舊制漢南部都尉在隴西永和中以來機為

郡臨洮縣今和政縣

并州刺史劉乘為涼州刺史大將軍梁商謂機等曰戎狄荒服言其荒忽無常而統領之道亦無常法臨事制宜略依其俗今二君素姓嫉惡欲分明白黑孔子曰人而不仁嫉之已甚亂也況戎狄乎其務安羌胡防其大故忍其小過機等天性虐刻遂不能從到州之日多所擾發五年夏且凍傳難種羌等遂反叛金城與西塞及湟中今西平郡西地雜種羌大寇三輔於是拜馬賢為征西將軍將左右羽林五校士及諸州郡兵十萬人討之又於

扶風漢陽隴道

扶風今汧陽扶風新平等郡地也漢陽隴道並今天水郡地

作塢壁

三百所置屯田以保聚百姓賢軍大敗賢及二子皆戰沒於是東西羌遂大會鞏唐種三千餘騎寇隴西北地又燒園陵掠關中殺傷長吏武威太守趙冲追擊冲雖戰沒而前後多所斬獲羌由是衰耗自永和羌叛十餘年間費用八十餘億諸將多斷盜牢廩私自潤入

牢價直

皆以珍寶貨賂左右上下放縱不恤軍事士卒不得其死者白骨相望於野桓帝延熹二年燒當八種寇隴右

以段頰為校尉將兵及湟中義從羌二千人擊破之追討南渡河募先登懸索相引刀折矢盡且鬪且行晝夜相攻割肉食雪三十餘日遂至河首積石山

山在今西平安鄉郡

界

出塞二千餘里前後斬首虜并受降各萬餘人會段

頰坐事徵羌遂陸梁覆沒營塢寇患轉盛中郎將皇甫規張奐雖累破之而寇不已復遣段頰擊之自春及秋無日不戰虜遂饑困敗散凡破西羌斬首二萬三千級獲生口數萬西羌於是弭定東羌先零等自覆沒馬賢

後既降又叛帝以問頰曰狼子野心難以恩納唯當白  
刃加領耳計其所餘三萬餘落居近塞內久亂并涼累  
侵三輔西河上郡已各內徙安定北地復至單危自雲  
中五原西至漢陽二千餘里

今榆林郡即漢雲中五  
原郡地漢陽今天水郡

匈

奴種羌並擅其地是為癰疽伏疹留滯脅下如不加誅轉  
就滋大若以騎五千步兵萬人車三千輛三冬兩夏足  
以破定無慮用費為錢五十四億如此可令羣羌破盡  
匈奴長服內徙郡縣得反本土伏計永初中諸羌反叛

十有四年用二百四十億永和之末復經七年用八十餘億費耗若此猶不誅盡餘孽復起於茲作害今不暫疲人則永寧無期帝許之靈帝建寧初頽與先零諸種戰斬首八千餘級頽復追之且破且追士皆重趼既到涇陽

今平涼郡平涼縣地

餘寇四千落悉散入漢陽山谷間時張

奐上言東羌雖破餘種難盡頽性果慮輕負敗難常宜且恩降可無後悔詔書下頽頽復上言曰臣本知東羌雖衆而軟弱易制所以比陳愚慮思為永寧之算而張

眞說虜強難破宜用招降云臣兵連年累見折衄又言  
一氣所生不可誅盡山谷廣大不可空靜臣伏念周秦  
之際戎狄之害中興以來羌寇最盛誅之不盡雖降復  
叛今先零雜種累以反覆攻沒縣邑剽掠人物上天震  
怒假手行誅臣自動兵衆和師克自橋門以西落川以  
東今金城會寧平涼等郡之地非為深險絕域之地車騎安行無慮  
折衄按負駐軍二年不能平寇誕辭空說僭而無徵何  
以言之昔先零作寇趙充國徙居內地前當煎亂邊馬

援遷之三輔始服終叛至今為梗故遠識之士以為深  
憂今傍郡戶口單少數為羌所瘡毒而欲令降徒與之  
雜居是猶種枳棘於良田養虺蛇於室內也故臣奉大  
漢之威建長久之策欲絕其本根不能使植本規三歲  
之費用五十四億今適周年所耗未半而餘寇殘燼將  
向殄滅臣每奉詔書軍不內御願卒斯言一以任臣臨  
時量宜不失權便二年頽遂進營逼諸羌大敗之於瓦  
亭山

在今平涼郡蕭關縣

羌衆潰東奔復聚射虎谷分守諸谷上

下門又先令千人於西縣

今天水郡上邽縣地

結竹為柵廣二十

步長四十里遮之然後兵擊之窮山深谷之中處處破  
之斬其渠帥以下萬九千級獲畜產諸物不可勝數於  
是東羌悉平凡百八十戰斬三萬八千六百餘級牛馬  
羊驢駱駝四十二萬七千五百餘頭費用四十四億將  
士死者四百餘人自爰劍後子孫支分凡百五十種其  
九種在賜支

賜支即析支

河首以西及在蜀漢徼北參狼在

武都勝兵數千人其五十二種衰少不能自立分散為

附落或絕滅無後或引而遠去其八十九種唯鍾最強  
勝兵十餘萬其餘大者萬餘人小者數千人更相鈔盜  
盛衰無常大凡順帝時勝兵可二十萬人發羌唐旄等  
絕遠未常往來羗牛白馬羌在蜀漢其種別名號皆不  
可知也中平元年北地降羌先零種及枹罕河關羣盜  
因黃巾大亂乃與漢中羌義從胡北宮伯玉等反寇隴  
右致金城人邊章韓遂共殺金城太守韓懿攻燒州郡  
入寇三輔侵逼園陵詔遣破虜將軍董卓討羌大破之

興平元年馮翊降羌反寇諸縣郭汜樊稠擊破之斬首數千級

姚氏

姚弋仲南安赤亭羌人世為羌酋其先燒當雄於洮罕之間七世孫填虞漢中元末寇擾西州為揚虛侯馬武所敗徙出塞虞九世孫遷那率種人內附漢朝嘉之假冠軍將軍西羌校尉歸順王處之於南安之赤亭那立孫柯迴為魏鎮西將軍綏戎校尉西羌都督迴生弋仲

少英毅衆畏而親之晉永嘉之亂東徙榆眉戎夏襁負  
隨之者數萬自稱護西羌校尉雍州刺史扶風公後歸  
劉曜曜以為平西將軍封平襄公曜亡復事石勃勃以  
弋仲行安西將軍六夷左都督石氏之亡遣使降晉詔  
拜持節六夷大都督車騎大將軍開府儀同三司大單  
于高陵郡公弋仲死子襄嗣自稱大將軍大單于引兵  
圖關中兵敗為苻生所殺襄弟萇降於生苻堅以為寵  
驥將軍封益都侯堅敗於淮南歸長安萇叛之自稱大

將軍大單于萬年秦王後襲堅執而弑之遂僭即皇帝位國號秦傳子興泓三十二年而亡

湟中月氏胡

湟中月氏胡其先大月氏之別也在張掖酒泉地月氏王為匈奴冒頓所殺餘種分散西踰葱嶺其羸弱者南入山阻依諸羌居止及漢將霍去病破匈奴取西河池

開湟中

今西平郡地

於是月氏來降與漢人錯居雖依附縣

官而首施兩端

首施猶言首尾

其後漢兵戰鬪隨勢強弱被服

飲食言語畧與羌同亦以父名母姓為種其大種有七  
勝兵合九千餘人分在湟中及今居又數百戶在張掖  
號曰義從胡後漢靈帝中平初與北宮伯玉等殺護羌  
校尉冷徵金城太守陳懿遂寇亂隴右焉

今天水郡  
以西北

范曄論曰羌戎之患三代尚矣漢世方之匈奴頗為  
衰寡而中興以後邊難漸大朝規失綏御之和戎帥  
騫然諾之信故永初中羣種蠭起遂解仇嫌結盟詛  
陸梁三輔建號稱制東侵趙魏之郊南入漢蜀之鄙

塞湟中斷隴道燒陵園剽城市傷敗踵係羽書日聞  
并涼之士特衝殘弊自西戎作逆未有陵斥上國若  
斯其熾者也和熹以女君親政威不外接朝議憚兵  
力之損情存苟安或以邊州難援宜見捐棄或懼疽  
食浸淫莫知所限謀夫迴遑猛士疑慮遂徙西河四  
郡之人雜寓關右之縣發屋伐樹塞其戀土之心燔  
破貲積以防顧還之思於是諸將鄧騭任尚馬援皇  
甫規張奐之徒爭設雄規更奉征討馳騁東西奔救

首尾搖動數州之境日耗千金之資至於假人增賦  
借奉侯王引金錢縑綵之珍徵糧粟鹽鐵之積所以  
賂遺購賞轉輸勞來之費前後數十巨萬或梟魁酋  
健摧破附落降俘載路牛羊滿山軍書未奏其利害  
而離叛之狀已言矣故得不酬失功不半勞官人屈  
竭烈士憤喪段頰受事專掌軍任蒙沒冰雪履千折  
之道始殄西種卒定東寇若乃陷擊之所殲傷追走  
之所崩籍其能穿窬草石自脫於鋒鏃者百不一二

而張負盛稱戎狄一氣所生不宜誅盡流血汙野傷  
和致妖是何言之迂乎羌雖外患實深內疾若攻之  
不根是養痾於心腹也

根謂盡其根本

惜哉寇敵略定矣而

漢祚亦衰焉嗚呼昔先王疆理九土判別畿荒知夷  
貊殊性難以道御故斥遠諸華薄其貢職唯與辭要  
而已若二漢禦戎之方失其本矣何則先零侵境充

國遷之內地

宣帝時後將軍趙充國擊先零還於金城郡置屬國以處降羌

當前作

寇馬援徙之三輔貪其暫安之勢信其馴服之情計

日用之權宜忽經世之遠畧豈夫識微者之為乎

氐

氐者西戎之別種在冉駹東北

今通化郡地之東北

廣漢之西

今梓

潼遂寧德陽

其種非一或號青氐或號白氐或號冉氐

郡地之北

冉而占反

此蓋中國人即其服色而名之也土地險阻有麻

田出漆蜜銅鐵椒蠟氐人勇戇抵冒貪貨死利居於河

池一名仇池方百頃四面斗絕

仇池山在今同谷郡上祿縣

數為邊

寇郡縣討之則依固自守其俗語不與中國及羌胡同

各自有姓如中國之姓其衣服尚青俗能織布善田種  
畜羊豕牛馬驢騾婚姻備六禮知書疏多知中國語由  
與中國錯居故也元封三年氐人反進兵討破之分徙  
酒泉郡昭帝元鳳初氐人復叛遣大鴻臚田廣明將三  
輔太常徒討破之至後漢初氐人悉附隴蜀及隗囂滅  
其酋豪乃背公孫降漢隴西太守馬援上復其王侯君  
長賜以印綬後囂族人隗茂反攻殺武都太守氐人豪  
齊鐘留為種類所敬信威服諸豪與郡丞孔奮擊茂破

斬之其後亦時寇盜郡縣不足為大患魏武之初諸氏  
戎或叛或伏乃令夏侯妙才討之因徙武都之種於秦  
川以禦蜀晉時關隴屢為氐羌所擾孟觀西討因擒氐  
帥齊萬年華陰令江統深惟四夷亂華宜杜其萌乃作  
徙戎論曰春秋之義內諸夏而外夷狄以其言語不通  
贄幣不同法俗詭異種類乖殊或居絕域之外山河之  
表崎嶇險阻之地與中國壤土隔不相侵涉賦役不及  
正朔不加故曰天子有道守在四夷其氣貪婪凶悍不

仁四夷之中戎狄為甚弱則畏服強則侵叛雖聖賢之

代大德之君咸未能以道化率導而以恩德柔懷也當

其強也以殷之高宗

武丁

而憊於鬼方有周文王而患昆

夷獫狁漢祖困於白登孝文軍於霸上及其弱也周公

來九譯之貢中宗

宣帝

納單于之朝以元成之微而猶四

夷賓服此其已然之效也故匈奴求守邊塞而侯應陳

其不可單于屈膝未央蕭望之議以不臣是以有道之

君不牧夷狄也唯以待之有備禦之有常雖稽顙執贄

而邊城不弛固守為寇賊強暴而甲兵不加遠征期令

境內獲安疆場不侵而已及至周室失統諸侯專征以

大兼小轉相殘滅封疆不固而利害異心戎狄乘間得

入中國或招携安撫以為已用故申繒之禍顛覆宗周

襄公要秦遽興姜戎當春秋時義渠大荔居秦晉之域

陸渾戎處伊洛之間搜瞞之屬

瞞莫干反

害及濟東侵入齊

宋陵虐邢衛齊桓攘之存亡繼絕北伐山戎以開燕路

故仲尼稱管仲之力嘉左衽之功逮至春秋之末戰國

方盛楚吞蠻氏晉翦陸渾趙開渝中之地秦滅義渠之種始皇帝之并天下也南兼百越北走匈奴五嶺長城戍卒億計雖師役煩殷寇賊橫暴然一切之功戎虜奔却當時中國無復四夷也漢興都長安關中之郡號曰三輔禹貢雍州宗周酆鎬之舊也及建武中以馬援領隴西太守討叛羌徙其餘種於關中居馮翊河東空地而與華人雜處數代之後族類蕃息既恃其強且苦漢人侵之永初之元騎都尉王弘使西域調發羌氏以為

行衛於是羣羌奔駭互相扇動二州之戎一時俱發覆  
沒將守屠破城邑鄧騭之征棄甲委兵輿屍喪帥前後  
相繼諸戎遂熾至於南入蜀漢東掠趙魏唐突軹關

今濟

源縣

侵及河內

今郡地

乃遣北軍中候朱寵將五營士卒於

孟津

今河陽縣

拒羌十年之中夷夏俱弊任尚馬賢僅乃克

之此所以為害尤重累年不定者雖由禦之者無方將  
非其才亦豈不以寇發心腹害起肘腋疹篤難療瘡大  
遲愈之故哉自此之後餘燼小有際會輒復侵叛馬賢

怵伏終於覆敗段熲臨衝自西徂東雍州之戎常為國  
患中代之寇唯此為大漢末之亂關中殘滅魏興之初  
與蜀分隔疆場之戎一彼一此魏武令夏侯妙才討叛  
氐阿貴千萬等後因拔棄漢中遂徙武都之種於秦川  
欲以弱寇強國捍禦蜀虜此蓋權宜之計一時之勢非  
所以為萬代之利也今者當之已受其弊矣夫關中土  
沃物豐厥田上上加以涇渭之流溉其鴻鹵鄭國白渠  
灌浸相通黍稷之饒畝號一鐘帝王之都每以為居未

聞戎狄宜在此土也非我族類其心必異戎狄志態不與華同而因其衰弊遷之畿服士庶翫習侮其輕弱使

其怨恨之氣毒於骨髓至於蕃育衆盛則生其姦心以

貪悍之性挾憤怒之情候隙乘便輒為橫逆而居封域

之內無障塞之隔掩不備之人收散野之積故能為禍

滋蔓暴害不測此必然之勢已驗之事也當今之宜宜

及兵威方盛衆未能定徙馮翊

今郡地

北地

今彭原郡

新平

今郡

安定

今郡

界內諸羌著先零罕开析支之地徙扶風

今郡地

始平

今金城武功縣地

京兆之氏

今京兆府地

出還隴右著陰平

今郡

地武都之界

武都今郡地

廩其道路之糧令足自致各附本

種反其舊土使屬國撫夷就安集之戎晉不雜並得其  
所上合往古即序之義下為盛代永久之規縱有猾夏  
之心風塵之警則遠絕中國隔闕山河雖為寇暴所害  
不廣是以充國子明能以數萬之衆制羣羌之命有征  
無戰全軍獨克雖有謀謨深計廣大遠圖豈不以華夷  
異處戎夏區別要塞易守之固得其成功者哉難者曰

方今關中之禍暴兵二載征戍之勞老師十萬水旱之害荐饑累荒疫癘之災札瘥天昏凶逆既戮悔惡初附且歎且畏咸懷危懼百姓愁苦異人同慮冀寧息之有期若枯旱之思雨誠宜鎮之以安悅而子方欲作役起徒興功造事使疲悴之衆徒自猜之寇以無穀之人遷乏食之虜恐勢盡力屈緒業不卒羌戎離散心不可一前害未及弭而後變復橫出矣答曰羌戎猾夏擅相署號攻城野戰傷害牧守連兵聚衆載離寒暑矣而今異

類瓦解同種土崩老幼繫虜丁壯降散禽離獸迸不能  
相一子以此等為尚挾餘資悔惡反善懷我德惠而來  
柔附乎將勢窮道盡智力俱困懼我兵誅以至於此乎  
曰無有餘力勢窮道盡故也然則我制其短長之命而  
令其進退由已矣夫樂業者不易事安居者無遷志方  
其自疑危懼畏怖促遽故可制以兵威使之左右無違  
也迨其死亡流散離邊未鳩與關中之人戶皆為讐故  
可遐遷遠處令其心不懷土也夫聖賢之謀事也為之

於未有理之於未亂道不著而平德不明而成今子遭  
弊事之終而不圖更制之始愛易轍之勤得覆車之軌何  
哉且關中之人百萬餘口率其少多戎狄居半處之遷  
之必須口實若有窮乏糝粒不繼者故當仰關中之穀  
以全生生之計必無擠於溝壑而不為侵掠之害今我  
遷之傳食而至附其種族自使相贍而秦地之人得其  
半穀此為濟行者以廩糧遺居者以積倉寬關中之逼  
去盜賊之源除朝夕之損建終年之益若憚暫舉之小

勞而忘永逸之弘策惜日月之煩費而遺累代之寇敵  
非所謂能開物成務創業垂統宗本拓跡謀及子孫者  
也并州之胡本實匈奴桀惡之寇也漢宣之代凍餒殘  
破國內五裂後合為二呼韓邪遂衰弱孤危不能自存  
依阻塞下委質柔服建武中南單于復來降附遂令入  
塞居於漠南數代之後亦輒叛戾故何熙梁懂戎車屢  
征中平中靈帝時以黃巾賊起發調其兵部衆不從而殺  
羌渠南單于也由是於扶羅羌渠之子求助於漢以討其賊仍值

代喪亂遂奔豐而作鹵掠趙魏寇至河南建安中又遣

右賢王去卑誘質呼廚泉

於扶羅之弟

聽其部落散居六郡

太原西河平陽上黨樂平地今郡地新興今雲中定襄郡地

咸熙之際以一部太極分

為三率泰始之初又增為四於是劉猛內叛

猛即元海之叔父右

賢王連結外虜近者郝散之變發於穀遠

惠帝元康中匈奴郝散反攻城

邑謀殺長吏於穀遠即今陽城郡太康縣

今五部之衆戶至數萬人口之盛

過於西戎然其天性驍勇弓馬便利倍於氐羌若有不

虞風塵之慮則并州之城可為寒心也滎陽句驪本居

遼東塞外正始中幽州刺史毋丘儉伐其叛者徙其餘  
種戶落百數子孫孳息

孳音茲

今已千計數代之後必至

殷熾今百姓失職猶或亡叛犬馬肥充則有噬齧況於  
夷狄能不為變夫為邦者患不在貧而在不均憂不在  
寡而在不安以四海之廣士庶之富豈須夷虜在內然  
後取足哉此等皆可申諭發遣還其本域慰彼羈旅懷  
土之思釋我華夏纖芥之憂惠此中國以綏四方也未  
及十年而夷狄亂華時人服其深識於是戎狄迭據中

原其為戰國者三十六載而劉元海為之禍首初後漢

建安中氐酋楊騰為部落大帥騰子駒勇健多計略始

據仇池於上平地立宮室果園倉庫其地東接秦嶺西

接宕昌八百里南去漢中四百里北至岐州三百里戶

本有十萬漸漸分減焉駒後有名千萬者魏拜為百頃

氐主千萬孫飛龍漸強盛晉武帝假平西將軍還居略

陽楊氏與符氏同出略陽略陽地今天水郡隴城縣無子養外甥令狐茂搜為

子晉惠帝元康初避齊萬年之亂率部落還保百頃自

號右賢王關中人士奔流者多依之自茂搜至姪曾孫

纂皆降附於晉受官爵苻堅遣將楊安苻雅等討纂克

之徙其人於關中空百頃之地初茂搜孫宋奴二子佛

奴佛狗奔苻堅以女妻佛奴子定以為尚書領軍將軍

及堅敗於淮南關中擾亂定盡力奉堅堅死將家奔隴

右徙理歷城

歷城在今同谷郡西  
十里去仇池九十里

置倉儲於百頃招合

夷夏人得千餘家進平天水略陽郡

天水略陽並  
今天水郡地

遂有

秦州之地

今天水隴西同谷  
武都陰平郡地

後與乞伏乾歸戰定軍敗

見殺佛狗子盛先襲位分諸四山氏羌為二十部護軍

各為鎮戍不置郡縣至子難當時宋梁州刺史

理漢中

甄

法護刑政不理難當舉兵襲梁州法護委鎮奔洋川

今洋

川難當遂有漢中之地

宋文帝元嘉十年

難當自為大秦王號

年曰建義置百官後傾國南寇規有蜀土不克乃還宋

文帝遣龍驤將軍裴方明等討難當方明等至漢中長

驅而進直到武興攻下辦

今同谷郡同谷縣

取白水克仇池難

當於是將妻子奔後魏難當從弟文度自立為武都

王後魏遣將皮歡喜破殺之弟文弘自為武都王至孫  
紹先為後魏將邢巒傅豎眼所破滅以其國為武興鎮  
今順政郡後改鎮為東益州後唐永為刺史氏人反攻圍州

城永歿氏遂削平城堞因此復為氏地西魏文帝大統  
四年南岐州氏苻安壽反攻陷武都自號大皇遣侯莫  
陳順等討破之周文帝於武興又置東益州以紹先子  
辟邪為刺史辟邪據州反吐羅協與趙昶討平之


苻氏

苻洪字廣世略陽臨渭氏人世為西戎酋長始其家池中蒲生長五丈五節如竹形時咸謂之蒲家因以為氏父懷歸為部落小帥先是隴右大雨百姓謠曰雨若不止洪水必起故因名洪好施多權略驍武善騎射晉永嘉之亂宗人蒲光等推洪為盟主劉曜僭號長安洪歸曜拜率義侯曜敗洪西保隴山又降於石虎拜冠軍將軍委以西方之事累有戰功封西平郡公其部下賜爵關內侯者二千餘人虎死洪降晉有衆十萬詔以為征

北大將軍都督河北諸軍事冀州刺史廣川郡公洪以  
識文有草付應王遂改姓苻氏自稱大將軍大單于三  
秦王洪死子健去秦王之號稱晉官爵遣使告喪自稱  
晉安西大將軍雍州刺史率衆西行入潼關取長安遂  
僭即皇帝位國號秦傳生堅丕登五世四十四年而亡



文獻通考卷三百三十三



總校官庶吉士臣張能照

校對官檢討臣盧應

膳錄監生臣錢璣